

DEVOZION

Vèrdene via Sènt'Ugèna

Respetan la restrizions i fascegn à podù preèr sia patrona



N moment de la messa en onor de Sènt'Ugèna tel santuarie sun Cislir de Vich.

Ai 16 de firé l'è sègra de Sènt'Ugèna, patrona de Fascia. Ence chest an, seence che a na vida deldut desferenta respet ai egn passé, en sie onor tel santuarie sun Cislir de Vich la jent de Fascia la l'à preèda con gran devozion. Ajache per la restrizions sanitèries podea ite te gejjia demò 45 persones a l'outa l'è stat ofizià messa trei outes, da mesa les nef dadoman, da mesa les unesc e dò amò da mesa les trei domesdi.

A la seconda zelebrazion, ofizièda da don Andrea Malfatti dessema con don Mario Bravin e don Luciano Mainini e manèda fora ence en

direta streaming sun la piata Facebook de la parochies de Fascia, l'è stat envià la autoritèda ziviles de Fascia en raprezentanza de la comunanza de duta la val. L'era i ombolc de Cianacei Giovanni Bernard, de Sèn Jan Giulio Florian e de Soraga Valerio Pederiva e i vizeombolc de Ciampedel Alessandro Bernard e de Moena Cristina Donei. L'era ence l conseier provincial Luca Guglielmi e l procurador Bepe Detomas che a la fin de la messa l'à let na orazion acioche Sènt'Ugèna vèrde via noscia val da chesta burta petorcena. Che à tout pèrt a la funzion l'è stat ence na raprezentanza di gropes con la bandieres de l'Union di Ladins e de la Musega da Vich.

Endèna la perdicia don Andrea l'à portà dant na reflescion fona sui burc tempes che sion dò a viver, tant dal pont de veduda sanitarie, sozièl e uman, ma ence economic,

e sun la forza che cognon aer duc ensema, se metan te la mans del Segnoredie.

A la fin de la funzion l grop di Paicenadores da Vich, che jà dadoman aea s'irà con sia piac fora per paisc, i à ampò paicenà. Semper en onor de Sènt'Ugèna l'è stat dit messa ence dadoman bonora da les ot ja Soraga e da les sie da sera te gejjia via Pera.

L'Union di Ladins de Fascia per festejèr la patrona de Fascia à slarià fora sun sie canai social na video-intervista ai sonadores de la ciampènes del santuarie de Sènt'Ugèna, ultima gejjia che tegn amò la ciampènes da sonèr a man, e l'à dat fora debant ai enteressé l liber de Père Frumenzio Ghetta che conta de la gejjia e de sia storia.

Nicoletta Ris